

08 DEC 2002

KAYSHANA TETAMU CILIK PM

PUTRAJAYA, 8 Dis (Bernama) -- Bayi perempuan berusia sembilan bulan V. Kayshana bertuah apabila Datuk Seri Dr Mahathir Mohamad bersedia menandatangani gambar tetamu cilik itu yang dibawa bersama-samanya ke majlis Rumah Terbuka Aidil Fitri Perdana Menteri di sini.

Bapanya, V.Valluvan, 31, seorang kakitangan di Jabatan Perdana Menteri dan ibunya S.Thilagarani, 27, berasa gembira apabila menerima jemputan Dr Mahathir ke majlis itu di kediaman rasminya, semalam.

Dr Mahathir mengadakan rumah terbuka untuk wakil-wakil asing, diplomat dan pemimpin tempatan pada hari kedua Aidil Fitri.

Perdana Menteri juga berbesar hati untuk memberi restu kepada Kayshana, seperti mana yang beliau lakukan kepada kedua-dua ibu bapa bayi itu pada majlis perkahwinan mereka di sini, yang pertama di pusat pentadbiran negara, setahun lepas.

"Kami berasa gembira dapat ke sini hari ini dan meminta Perdana Menteri untuk memberi restu kepada anak perempuan kami," kata Valluvan.

Thilagarani, yang menganggap Dr Mahathir seorang lagenda, berkata mereka sekeluarga pasti merinduinya memandangkan beliau akan meletakkan jawatan sebagai Perdana Menteri pada Oktober tahun depan.

-- BERNAMA

SM SLR NAK